

Festivalie

Gerè metā, dèdlē poikè metā,
Dèdlē šeltas, dèdlē švèisès dèinas.
Naujè vèsū švarkā, naujè batā,
I mergelkas važuojēs nebvèinas.

Su neiluonās i su strainēs vaikēs
Vākščiuo vèsas – poikès kap givatès!
Kor mon līstè su skarmalās palaikēs? –
Pri puikībiu tuokiū aš nepratès.

Stuovio krūmūsè, prisiartintè giedous,
Už pošèis užlindès šalèp kelè.
Goudous prisigierosem susiedou,
Bet i tas – neklausuos nie bėškelè.

Tiktā spjauduos, cėgarietus kūrèn,
Kaikū bliorb, tik kū – negal suprastè:
A ka kuliganā šliauka pradūrō,
A ka nomèi kelè nebgalis rastè.

Miegèno su pèiminims rokoutèis –
Mona rūpesnè ne galvuo i tèm:s
Rūp velnātèms tik po krūmus doutèis,
Rūp tik dornè špuosā i siotèm:s.

Čè užgrajėj trūbā – šonkè tronkè –
Kuojès patès praded šuokinietè.
Veizo – šuok vèinkuojè i vèinronkè –
Kap mon su dvèm kuojèm ištūrietè?

Junto – kaikas patès kėnklès degèn,
Vo mergelkas švaipuos, duntis ruoda...
Nebgalio iškintietè – i mauno tekèns,
No, i šuoko, kap pragierès pruota!